

Caredanan di Formula Uno ta tuma un birada impredecible mientras hefe di McLaren ta disfruta e 'miho temporada'

(AP) — Despues di un emocionante Grand Prix na Azerbaijan, ta parce cu casi mita di e campo ta capaz di gana careda den Formula Uno. Director di McLaren, Zak Brown, kende su piloto Lando Norris ta e retador mas cercano di Max Verstappen pa e titulo, a bisa cu e ta disfrutando e miho show cu el a mira den su ocho aña den F1.

Ya tabatin seis ganador diferente den e ultimo ocho careda, representando cuatro diferente team. Verstappen, kende su dominio na 2022 y 2023 a kibra record, ainda ta lider den clasificacion, pero su ultimo victoria tabata na juni.

"Mi ta kere cu esaki ta e miho temporada cu mi por pensa den Formula 1 desde cu mi t'ey," Brown a bisa AP na Tennessee. Brown hasta ta pensa cu e por ta miho cu e bataya entre Verstappen y



Lewis Hamilton na 2021, cu a keda determina den e vuelta final di e aña y a yuda e boom di F1 riba Netflix. "Esey tabata mega emocionante, pero ta djis dos guy, dos bon guy. Awo bo tin cuatro team bon den e careda di awe," el a bisa.

"Pa tin cuatro team cu por gana cualkier weekend, y (Sergio) Perez obviamente tabata back den forma awe, ocho piloto bayendo Singapur y nos ta pensa, 'mi no sa cua di e cuatro team aki por

gana. Mi no sa cua di e ocho piloto por gana,' mi no por corda Formula 1 teniendo e nivel di competencia aki."

Tabatin accion constante dia-domingo ultimo. Oscar Piastri di McLaren a bay cu e victoria na Baku, pero solamente despues di tribi di pasa Charles Leclerc di McLaren. Perez tabata den mix pa Red Bull te ora cu el a boks cu Carlos Sainz Jr. di Ferrari, entregando di tres lugar na George Russell di

Mercedes.

Mas patras, Norris a pasa door di e campo for di posicion 15 pa di 4 dilanti di Verstappen y a recorta un pida mas di e bentaha di e campeon den clasificacion.

Prestacion di e teamnan ta varia cada siman, dependiendo riba upgrade di fabrica, condicionnan di e pista y cambionan di setup, manera esun cu Verstappen a culpa pa daña su weekend na Azerbaijan. Hasta un cambio di taira por converti un persona den campeon, Russell a bisa dia-domingo. "Apenas den e un careda aki, nos tabatin un auto cu por a gana si bo tuma e velocidad di mita di e careda y un auto cu mester a keda afo di e top 10 for di e otro mita," el a bisa, agregando: "Pues mi ta spera cu nos tin e version mas lihe" pa e careda na Singapur proximo siman.

E pista riba caya di Singa-

pur tabata anfitrión di un di e caredanan mas competitivo pa un temporada por lo demas domina pa Red Bull na 2023. Riba tairanan gasta, Sainz a mantene e McLaren di Norris y e dos Mercedes di siete-biaha campeon Hamilton y Russell su tras – Russell a crash for di di tres lugar den e ultimo buelta.

Piastri ta e piloto on-form cu mas punto di tur den e ultimo siete careda di F1. E sa cuanto parti ta involucra den exito e aña aki, y con lihe tur cos por cambia. "Nos ta in cu un chens tur caminda, y mi ta kere cu awe definitivamente tabata un di e dianan unda nos no tabata necesariamente mas lihe, pero nos tabatin un auto cu por pone nos den e bataya," e Australiano a bisa. "Nos tabatin un pit stop cu por a pone nos den e bataya. Nos tabatin trabao en ekipo cu a pone nos den e bataya. Y tur esey a logra duna resultado."

Cu curason semper pa deporte

Despues di 15 aña di dedicacion, Juvenal Nava ta despedi di Comité Olimpico Arubano

Diabierna ultimo, den sala di reunion na oficina di Comité Olimpico Arubano, a hiba manera tur diabierna ta haci, e reunion general di Direccion di Deporte. Locual cu a haci e reunion special, ta cu na final a tene momento di reconocimiento y despedida di nos gran colega Juvenal Nava.

Juvenal, mihor conoci como "Nal" a forma parti di e ekipo di e comision tecnico di COA

pa e ultimo 15 aña, unda cu e tabata tin un gran aporte na e exito di nos atletanan den e ultimo ciclonan olimpico. Mayoria federacion deportivo cu ta forma parti di e famia di COA, sigur a ricibi bishita di Nal, como e tabata forma parti di e team tecnico cu tabata observa entrenamiento di nos atletanan di alto rendimiento. Ademas di tur su aporte riba nivel tecnico, Nal ta un persona semper alegre, cu tur hende ta respeta pa su gran conocimiento di deport-



enan y su manera trankilo di maneha tur situacion. Na final di e momento spe-

cial aki, unda Nal a ricibi entre otro un plakkaat como recuerdo di su añanan di ser-

vicio y dedicacion pa deporte y COA, a nombr'e como e prome miembro honorario di COA su Direccion di Deporte, y semper e lo keda envolvi den nos eventonan. Nal mes a duna di conoce cu a pesar di su decision pa dedica su tempo mas na su famia, en especial su nietonan, e semper ta dispuesto di duna un man unda necesario, como COA y deporte semper tin un lugar special den su curason.

OCA a eligi directiva nobo pa 2024-2027

Dia 21 di Augustus, miembronan di Organizacion Caballista Arubano (OCA) a eligi un directiva nobo pa e termino di 2024 pa 2027. E directiva aki lo tin un tarea grandi su dilanti, ya cu otro aña OCA ta cumpli su di 40 aniversario y e plan ta pa celebra esaki durante henter e aña.

Asina por menciona cu OCA lo tene un exposicion di e movimiento caballista na Aruba, pero tambe ta trah-

ando riba un compilacion di historia oral di cabay y caballista y proximamente lo traha un documentario cu lo ilustra e historia di cabay na Aruba di e tempo pre-colonial te presente.

Banda di esaki OCA tin un Master Plan ambicioso cu ta cubri henter e funcionamiento y movimiento caballista den un forma detaya. E Master Plan aki a carga aprobacion di e presentenan durante un town hall meeting teni na MFA Paradera, cu a conta cu

un grupo masal di caballista.

E directiva nobo ta forma pa Tom Pietersz como presidente, Anneline Peterson secretario, Brigitte Werleman tesorero, Jemina Martis vicepresidente y comisionan ta Etline Tromp, Michael de Cuba y Joshua Bello.

E fin di siman aki lo tin un competencia local y dia 25,26 y 27 di October OCA lo tin su Interpaso cu un participacion internacional di cabay, pero tambe jinete y amazona.

